

بے ایمان ٹیکس کہنے والے نی توبہ

19

1 جس ویلے حضرت عیسیٰ اریحا شہر وچوں
پئے لنگٹے سن، 2 اُتھے زکائی نائیں نا اِک
بندہ سی، جیہڑا ٹیکس کہنے آلیاں نا افسر سی۔ او امیر
آدمی سی۔ 3 اُس حضرت عیسیٰ کی تکتے نی بہوں
کوشش کیتی، پر اپئے نکرے قد تے پھیڑ نی وجہ توں او اُنہاں
کی ناں تکی سکیا۔ 4 اُس گے کیتا کہ اگے دوڑی گے اُس
راہ وچ جتھوں حضرت عیسیٰ لنگٹے سن، پھگواڑیاں نے
اِک بوئے پر چڑھی گیا۔ 5 جیہڑے ویلے حضرت عیسیٰ
اُس جغہ پُہنچے تے اُنہاں پر تکی گے اُسی آخیا، ”زکائی،
جلدی تھلے آ! آج ضروری اے کہ میں تہاڑے کہار
رہاں!“ 6 او جلدی جلدی تھلے لٹھا، تے بہوں خوشی نال
حضرت عیسیٰ کی اپئے کہار ہٹی گیا۔ 7 سارے لوک
اے گل تکی گے بہوں خفا ہوئے تے آخٹ لغے، ”اُتھے
تکو! اے تے غنہگار بندے نے مہمان ہٹی گئے ان!“
8 اِسے دوران، زکائی کھلی گے حضرت عیسیٰ کی
آخیا، ”حضور تکو! میں اپئے سارے مال نا اُدھ

غریباں پر بندُساں، تے جس کُسے کولوں کُجھ ناجائز
 کہندا اے، اُسی اُس نا چار گُنا موڑی کے دیساں!“
 9 حضرت عیسیٰ اُسی آخیا، ”آج اِس کہار وچ
 نجات آئی گئی اے، کیئانکہ اے بندہ وی تے
 آل ابراہیم اے۔ 10 گل اے اے کہ ابنِ انسان یعنی
 کہ میں اُنہاں لوکاں کی لوڑنے واسطے تے نجات
 دینے واسطے آیا آں جیہڑے گمراہ ہوئے وے اِن۔“

سونے نرے سکرے نی مثال

11 جیہڑے ویلے لوک حضرت عیسیٰ نیاں گلاں سُننے پئے
 سُن، تے او سوچنے سُن کہ اِک دَم اللہ تعالیٰ نی بادشاہی
 اچھسی، کیئانکہ او یروشلم شہر نرے نیڑے پُہنچے وے
 سُن۔ اِس واسطے حضرت عیسیٰ اُنہاں کی اِک مثال
 سُنائی کے 12 آخیا، ”اِک واری اِسرح ہویا کہ کوئی نواب
 زادہ سی۔ او دُور کُسے مُلخے در گیا تانکہ اُسی اپنی
 ریاست نا بادشاہ بٹائی کے واپس پھیجیا جائے۔ 13 جانے
 تُوں پہلے اُس اپنے نوکراں وچوں دس نوکراں کی بُلائی

کے ہر اک کی سونے نا اک اک سیکہ دتا تے آخیا،
'مہاڑے مڑی کے اچھٹے تک اس تون کجھ کماؤ۔'

14 پر اس نے ملخے نے لوک اس نال دُشمنٹی کرنے
سن۔ اس نے جائے تون بعد انہاں کجھ بندیاں نے
ذریعے بڑے بادشاہ کی اے سنیہا پھیجیا، 'اساں
ناں چاہئے کہ اے بندہ اساں اپر حکمرانی کرے۔'

15 پر اسرح ہویا کہ او، بادشاہ بٹی گیا۔ تے مڑی اچھی کے
اس انہاں نوکراں کی بلایا جنہاں کی اس سونے نے سکے
دتے سن تانکہ انہاں کولوں کمائی نا حساب کتاب پُچھے۔

16 پہلے نوکرے اچھی کے دسیا، 'حضور، تسان نے
دتے وے سکے تون میں دس گنا کمائی کیتی اے۔'

17 مالکے خوش ہوئی کے اسی شاباش دتی تے
آخیا، 'بہوں اچھا! تون چنگا نوکر این! تون تھوڑے

کمے وچ وفاداری کیتی اے، اس واسطے ہن
میں تکی دس شہراں نا نگران مقرر گرساں۔'

18 ڈوئے اچھی کے آخیا، 'حضور، تسان نے دتے
وے سکے تون میں پنج گنا کمائی کیتی اے۔'

19 مالکے خوش ہوئی کے اسی وی آخیا، 'تُکی
میں پَنج شہراں نا نِگران مقرر کرساں۔'

20 تریئے اچھی کے آخیا، 'حضور، اے کہنو اپنا سیکہ۔
میں اِس کی رُومال وچ سنبھالی کے رخیا۔ 21 مکی تُساں
نا ڈر سی کیئانکہ تُساں بہوں سخت آدمی او۔ تُساں او
پیسے بینک وچوں کہننے او جیہڑے تُساں جمع نی
کرائے۔ تُساں او فصل کٹھے او جس نا تُساں ہیں نی رایا۔'

22 مالکے خفا ہوئی کے اسی آخیا، 'او بُریا نوکرا! میں
تھاڑے ہی لفظاں نے مطابق تھاڑا فیصلہ کرساں! تُکی
پتہ وی سی کہ میں سخت آدمی آن، تے میں او پیسے
بینک وچوں کہننا آن جیہڑے میں جمع نی کرائے، تے
میں او فصل کٹھا آن جس نا میں ہیں نی رایا۔ 23 تُوں مہاڑا

پیسہ بَنک وچ کیئاں نی رخیا؟ تانکہ مُڑی اچھی کے
مکی اِس نال گُجھ تے منافع لبھے۔' 24 فِر مالکے اُتھے
موجود دُوئے نوکراں کی آخیا، 'اِس کولوں اے سیکہ چاہی
کہنو تے اسی دیو جس دس گُنا کمائی کیتی اے۔'

25 اُنہاں آخیا، ’حضور، اُس کول تے

پہلے ہی دس سِکے ہوئے وے اَن!‘

26 مالکے آخیا، ”ہاں، اے گل سچ اے کہ جس کول

کُجھ اے وے، اُسی ہور وی دتا جاسی۔ پر جس کول

کُجھ وی نی، اُس کولوں او تھوڑا جیا وی واپس کہندا

جاسی جیہڑا اُس کول موجود ہونا اے۔ 27 ہُن تِساں اِسرَح

کرو کہ مہاڑے اُنہاں دُشمنٹاں کی جیہڑے تے نی چاہئے

سُن کہ میں بڑا نواب بٹی کے حکمرانی گراں، اُنہاں کی

پغڑی کے اِتھے اَنو تے مہاڑی اکھیاں نے سامنے مارو۔“

حضرت عیسیٰ نایروشلیم شہر نے کول عزت نال پُہنچنا

28 اے گلاں ختم کری کے حضرت عیسیٰ یروشلیم شہر

در تری پئے۔ 29 جس ویلے او کوہ زیتون اپر اُس جغہ

پُہنچے جتھے بیت فاجی تے بیت عنیاہ گراں سُن، تے

اُنہاں اپنے صحابیاں وچوں دواں صحابیاں کی اے آخی

کے اگے پھیجیا، 30 ”سامنے آئے گرائیں وچ جاؤ تے اُتھے

پُہنچی کے تِساں کی اِک کھوتا بدھیا نظر اچھسی۔

اُس پر پہلیس کُسرے وی سواری نی کیتی وی ہوسی۔
 اُسی کھولی کے مہاڑے کول کِہنی آئو۔³¹ ترے کدے
 کوئی تُساں کولوں پُچھے، 'اِس کی کِیاں کھولتے او؟'
 ترے اُسی آخو، 'ساڑے مالکے کی اِس نی لوڑ اے۔'
³² فر او صحابی گئے ترے جسرح حضرت عیسیٰ اُنہاں
 کی آخیا سی، اُسے طرح ہویا۔³³ جیہڑے ویلے او کھوتے
 کی پئے کھولتے سٹ ترے اُس نے مالکاں پُچھیا، "کھوتے
 کی کِیاں پئے کھولتے او؟" ³⁴ صحابیاں جواب دتا،
 "اَساں نے مالکے کی اِس نی لوڑ اے۔" ³⁵ اُنہاں کھوتے
 کی آندا ترے اِٹیاں چادراں اُس پر بائی کے حضرت
 عیسیٰ کی اُس پر بہالی شوڑیا۔³⁶ جیہڑے ویلے حضرت
 عیسیٰ اُس پر بیہی کے پئے جائے سٹ ترے لوک اُنہاں
 نی عزت کرنے واسطے اِٹیاں چادراں راہ وچ ڈاہننے سٹ۔
³⁷ جیہڑے ویلے حضرت عیسیٰ اُس جغہ پُہنچے جتھے
 کوہ زیتون توں سڑک ٹلائی در جاٹی اے، ترے پیروکاراں
 نے سارے ہجوم اللہ تعالیٰ نا شکر کری کے اُچی اُچی
 آوازاں وچ حمد و ثنا کیتی کِیاںکہ اُنہاں حضرت

عِیسیٰ کولوں بہوں سارے مُعجزے ہوئے تکرے وے سٹ۔
 38 او دَبی دَبی کرے نعرے مارنُ لغے، ”مبارک آے او
 بادشاہ، جیہڑا ربّ نے ناں اپر اچھٹا آے! آسماناں اپر
 صلح ہووے تے بلندیاں اپر اللہ تعالیٰ نی حمد و ثنا!“
 39 ہجُوم وِچوں فریسی فرقیے نے کُجھ لوکاں حضرت
 عِیسیٰ کی آخیا، ”حضرت، اُنہاں کی چُپ کراؤ!“
 40 حضرت عِیسیٰ اُنہاں کی جواب دِتا، ”یاد رَحو،
 کدے اے چُپ ہوئی گئے، تے راہ نے بٹّے وی بولسٹ!“

حضرت عِیسیٰ یروشلیم شہر کی تکی کے روئی پئے

41 جیہڑے ویلے حضرت عِیسیٰ یروشلیم شہر نے کول
 پُہنچے تے اُسی تکی کے روئی پئے۔ 42 اُنہاں آخیا،
 ”افسوس تہاڑے لوک امن و سلامتی نیاں گلاں آج وی
 سمجھی کِہنرے! پر ہُن او گلاں تہاڑیاں اکھاں تُوں
 چھپی گئیاں! 43 او ویلا اچھسی جدوں تہاڑے دُشمنٹ
 چوآں پاسوں اچھی کے مورچہ بٹائی کے کہیری کِہنسٹ
 تے تکی دُکی شوڑسٹ۔ 44 او تکی تے تہاڑے لوکاں

کی بلکل تباہ کرسٹ۔ او تہاڑی اٹ نال اٹ بجائی
 شوڑسٹ، کیٹانکہ تہاڑے لوکاں اُس موقعے کی ضائع کیتا
 جیہڑے ویلے اللہ تعالیٰ انہاں اپر نظرِ کرم کیتی سی۔“

حضرت عیسیٰ بڑے عبادت خانے وچ داخل ہوئی جائے ان

45 فر حضرت عیسیٰ بڑے عبادت خانے وچ داخل
 ہوئی کے جیہڑے لوک اُتھے کاروبار کرنے سن،
 انہاں ساریاں کی باہر کڈھنا شروع کیتا۔ 46 حضرت
 عیسیٰ انہاں کی آخیا، ”اللہ تعالیٰ نے کلام وچ لِحیا
 اے، ’مہاڑا کہار عبادت واسطے اے۔‘ پر تُساں
 اِس پاک گہرے کی ڈاگواں نا اڈا بٹائی شوڑیا!“
 47 حضرت عیسیٰ روز بڑے عبادت خانے وچ جائی
 کے لوکاں کی تعلیم دیتے ہوئے سن۔ بڑے مذہبی
 پیشوانواں، شریعت نے عالماں تے بنی اسرائیل نے
 بڑے بڈیریاں نی بہوں کوشش سی کہ کُسے طرح
 انہاں کی شہید کری شوڑن۔ 48 پر انہاں کی کوئی

مناسب موقع نی پیا لبھٹا سی، کیئانکہ لوک بہوں
دلچسپی نال انہاں نیاں گلاں سُننے ہونے سن۔

نور-ے-کشمیر



اللہ تعالیٰ اپنا فضل ترے امن پاک نبیاں نے ذریعے انسانیت پر ظاہر
کیتا۔ اسان نا دلی مقصد اے کہ اس پیغام کی پھیلا یا جائے۔
اسان خوشی نال عیسیٰ المسیح نے بارے وچ تسان نال گل
کرساں، یا تسان نال دُعا کرساں، یا تسان نی مدد کرساں۔



<https://m.me/noor3kashmir> WhatsApp +447726104324 <https://noorekashmir.com>

Copyright © 2020 Noor-e-Kashmir
Creative Commons Attribution-NonCommercial-NoDerivatives 4.0 International
(CC BY-NC-ND).